

समे — 12:25

<><><><><><>

PM Sonamarg Tunnel Inauguration

जम्मू-कश्मीर लेई इक महत्वपूर्ण पैहलकदमी दे तैहत प्रधानमंत्री नरेन्द्र मोदी होर अज्ज बड़े मते सामरिक महत्व आहली तकरीबन 12 किलोमीटर लम्मी सोनमर्ग सुरंग दा उद्घाटन करै करदे न। 2 ज्हार 700 करोड़ रुपें दी इस परियोजना कन्नै श्रीनगर ते सोनामर्ग बश्कार पूरे ब'रे हर रूतै च सिड़क संपर्क दी सुविधा उपलब्ध होग ते कन्नै मुकामी कारोबार ते सैलसफा गी बी बढावा थ्होग। इस मौके उपपर केन्द्री मंत्री डाक्टर जीतेन्द्र सिंह, मुख्यमंत्री ओमर अब्दुल्ला ते होर बी केई गणमान्य हस्तियां उत्थे मजूद हिआं।

<><><><><><>

PM Maha Kumbh

प्रधानमंत्री नरेन्द्र मोदी होरें अज्जै थमां प्रयागराज च महाकुंभ 2025 दे शुरु होने दे मौके उपपर सब्बनें गी मुबारकबाद दित्ती ऐ। सोशल मीडिया पर इक पोस्ट राहें प्रधानमंत्री होरें भारती संस्कृति ते मुल्लें-कदरें दा मान करने आहले करोड़ा बद्धे लोकें लेई इसी इक खास ध्याडा करार दित्ता ऐ। उनें आखेआ जे महाकुंभ दा एह पर्व देसै दी शाश्वत आध्यात्मिक विरासत दा प्रतीक ऐ ते करोड़ा बद्धे लोकें दी आस्था ते सम्बोध दा जश्न बी मनांदा ऐ। श्री मोदी होरें लक्खां बद्धे लोकें दे प्रयागराज पुज्जने ते उत्थे पवित्तर श्नान करने उपपर खुशी जताई ऐ।

<><><><><><>

MoS Delhi Based Dogra Community

केन्द्री मंत्री डाक्टर जीतेन्द्र सिंह होरें दिल्ली शैहरा दे विकास लेई बेशकीमती जोगदान देने गितै दिल्ली च बस्से दे डोगरा समुदाय दे लोकें दी सराहना कीती ऐ। नमीं दिल्ली च डोगरा वेलफेयर एसोसिएशन आसेआ आयोजित इक कार्यक्रम दरान बोलदे होई मंत्री होरें आखेआ जे दिल्ली च रवै करदे डोगरें दी गिनतरी तकरीबन 1 लक्ख कोला लेइयै डेढ़ लक्ख दे बश्कार ऐ ते एह दिल्ली दे विकास-बाददे च बड़ी महत्व आहली भूमिका निभाऽ करदे न। इस कार्यक्रम दा मकसद दिल्ली दे समाजी-आर्थिक विकास च उत्थे रवै करदे डोगरें दे सकारात्मक प्रभाऽ ते उपलब्धिएं दा जश्न मनाना हा।

<><><><><><>

VDG Training

भारती फौज दी चिनाब ब्रिगेड आसेआ जम्मू दे बन्ने आहले ग्राएं च ग्राम रक्षा गार्डें लेई हफ्ते भरै दे सिखलाई कार्यक्रम दा सरिस्ता कीता गेआ तांजे उनें'गी गोली चलाने सने रक्षा सरबंधी

होरने दुइएँ महत्वपूर्ण तकनीकें बारै जानकार बनाया जाई सकै। इस पैहलकदमी दा मकसद मुकामी स्वयंसेविएं गी रक्षा दे गुर सखाइयै सशक्त बनाना ऐ तांजे ओह सुरक्षा सरबंधी स्थिति बरकरार रखने च अपनी भूमिका निभाई सकन। इस गैह दा मकसद इस गल्लै गी पक्का करना बी ऐ जे बन्ने आहले ग्राएं च रवै करदे समुदायें दी सुरक्षा निगगर बनी दी रवै।

<><><><><><>

DIG DC Badhaal visit

रजौरी पुंछ रेंज दे डीआईजी तेजिंदर सिंह होरें रजौरी दे डिप्टी कमिशनर अभिशोक शर्मा ते एसएसपी गौरव सिकरवार हुंदे कन्नै रजौरी दे बडहाल ग्रां दा दौरा लाइयै उत्थे हालात दा जायजा लैता ते समुदाय लेई फौरी मदाद जकीनी बनाने लेई आखेआ। डिप्टी कमिशनर होरें लोडचदी डाक्टरी सहायता उपलब्ध करोआने लेई उत्थे एम्बूलेंसें, सेहत टीमें ते आशा वर्करें दी तैनाती दे निर्देश दित्ते। जांच लेई कसरी लोकें दे नमूने लैते गे तांजे उंदी बमारी दिएं वजहें दा पता लाया जाई सकै। पुलसै बी इस सरबंधै च नमैं सिरेया जांच रम्भी दित्ती ऐ। ध्यानजोग ऐ जे बडहाल ग्रां च संदिग्ध बिसली रूट्टी खाने करी केई लोकें दी मौत होई गेई ही। डिप्टी कमिशनर होरें लोकें गी जकीन दोआया ऐ जे उंदी मदाद लेई हर मुमकन गैह पुट्टी जाहग। उनें लोकें गी गुजारिश कीती ऐ जे ओह सबर रखन ते जारी दिशा-निर्देशों दी पालमा जकीनी बनान।

<><><><><><>

DC Purmandal Visit

सांबा दे डिप्टी कमिशनर राजेश शर्मा होरें हाल च गै पुरमंडल ब्लाक दा व्यापक दौरा लाया ते उत्थे मुकामी लोकें कन्नै गल्लबात करियै उंदिएं समस्याएं गी सुनेआ ते उंदा नबेड़ा बी करोआया। अपने दौरे दुरान डिप्टी कमिशनर होरें देविका नदी दा निरीक्षण कीता ते ओहदे विकास लेई सरबंधत अधिकारिएं गी लोडचदे निर्देश जारी कीते। देविका नदी दे धार्मिक महत्त्व पर लोऽ पांदे होई डिप्टी कमिशनर होरें ओहदे रख-रखाऽ ते साफ-सफाई लेई असरदार ढंगै नै कार्रवाईयां करने दा जकीन दोआया। उनें ब्लाक दे पूरे-पराते विकास लेई प्रशासन दी वचनबद्धता गी दोहराया ते कन्नै इस गल्लै दा जकीन बी दोआया जे इलाके च ढांचागत विकास ते विरासती थाहरें दे संरक्षण दे कन्नो-कन्नी लोकें दिएं जायज समस्याएं दा हल बी पक्क गै करोआया जाहग।

<><><><><><>

Kho Kho World Cup

खो-खो सरबंधी विश्व कप 2025 अज्जै थमां नमीं दिल्ली दे इंदिरा गांधी इन्डोर स्टेडियम च शुरू होग। भारती ओलंपिक संघ आसेआ आयोजित इस प्रतियोगिता च मर्दे दिआं 20 ते महिलाएं दिआं 19 टीमां हिस्सा लै करदिआं न। भारत दे खो-खो फैंडरेशन नै मर्दे ते महिलाएं दे मुकाबलें लेई 15एं-15एं मैम्बरें आहलिएं टीमें दा ऐलान कीते दा ऐ। अज्ज इस प्रतियोगिता च भारती मर्दे दी टीम अपना पैहला मुकाबला नेपाल दे खलाफ खेड्ढोग। एह मैच रातीं साड्ढे 8 बजे थमां खेड्ढेआ जाहग।

<><><><><><>

Weather

जम्मू—कश्मीर च औने आहले किश दिनें दरान मौसम आमतौर उप्पर साफ ते खुश्क रौहने दी मेद ऐ। मौसम विभाग नै आखेआ ऐ जे औंदी 19 जनवरी तगर मौसम च कुसै बड्डे बदलाव दे कोई असार नेई हैन। उआं कश्मीर संभाग दिएं उच्चिएं धारें पर औंदी 16 जनवरी गी हौली बर्फबारी होई सकदी ऐ। कुल रलाइयै खित्ते च औने आहले दिनें दरान मौसम दे सूरते हाल च कोई बड्डी तब्दीली दी मेद नेई ऐ। तोआई जम्मू—श्रीनगर राश्ट्री जरनैली सिड़क — एनएच44 पर गडिडएं दी आओजाई बवस्थित ढंग्गै कन्नै चलै करदी ऐ ते लोकें गी सलाह दित्ती गोई ऐ जे ओह दिनै बेल्लै गै पूरे अनुशासित ढंग्गै कन्नै सफर करन। उआं ऐतिहासिक मुगल रोड अजें बी गडिडएं दी आओजाई लेई अजें बी बंद ऐ।

<><><><><><>